



Artisti antichi che mo-
relativi alle Arti del disegno
nienza; e Commissionario

Venezia Sotto le Procurat. Vecchie Maneg. 130.



#46319

CD000/-

R2523

R-2

THE VIGNETTE BY STEPHEN J. BELL
IS DE VESME'S N° 37 (only state and use.)

46 pp, 14 blank

C. 3. 12

GENIO MAIESTATIQ.
SERENISSIMORVM CONIVGV
COSMI PRINCIPIS
ETRVRIÆ,
MARGARITÆ ALOYSIÆ
AVRELIANENSIS,
NVPTIALEM PANEGYRICVM CONSECRAT
Valerius Chimentellius.



FLORENTIÆ,

Ex Typographia Iosephi Cocchini ad insigne Stellæ MDCLXI.

Superiorum permissu.

GENIO MAIESTATIS
 SERENISSIMORVM CONIVGV
 COSMI PRINCIPIS
 ET RVRI
 MARGARITAE ALOYSIAE
 AVRELIANENSIS
 VIRTUTALIVM PANEGYRICVM CONSECRAVIT
 Venerabilis Canonice



FORNIA
 In Typographia Regia et Universitaria



PANEGYRICVS.



IRABILE, ac perfectum illud opus, rerum omnium pulcherrimum, quas Diuina manus condiderit; primum humanæ familiæ patrem, ac propagatorem; altissimum felicitatis, supra quam vota deficiunt, tenuisse fastigium: Sacrosanctæ auctoritatis, nullis fabularum temeratæ ludibrijs solida suffragante fide quis nescit? Sed nemo peraequè ignorat, quàm cito flos hic tam fulgidi honoris contabuerit: risus hic beatitudinis tam serenæ in lacrymas illicò verterit miseriarum. Non etenim commentitiæ nescio cuius fœminæ returatum improvidè vas, innumeram malorum pestem, furialemque calamitatum colluiem in genus humanum effudit: sed primigenia cupido diuini interdicti contemptrix, beatissimo innocentiae patrimonio nuper locupletem euerit, ornatumque tot summis muneribus Principem, in ipso fortunarum carcere ad metam, heu! omni sæculo deflendam, omni posteritati formidandam allisit. Hinc mutata naturæ obsequia; turbatus ordo, atque inuersi fasces tam adoratæ potentiae. Terra sponta-

neæ nuper fœcunditatis eiurare gratiam condidicit;
 neq. fidis vt antea vberibus concepta semina fouere,
 atq. alere; sed nouercali vlna comprimere, spinarum
 fascijs inuoluere, malorumq. germinum gliscente fibra
 necare. Non fruges inaratas Cælo tantum seminato-
 re crescentes mortalium vsui dispensare; sed copioso
 vultus sudore conspersas, longaue patientia, atque
 expectatione educatas, vix tandem maligna fide re-
 ponere. Tot interim noxarum extimescenda tempe-
 stas, animatis ad nocumenta syderibus; siue vredo
 æstiuæ, & siccus vapor retorreat; fœdus imber putre-
 faciat; ruens grando comminuat; niualis albor, ac
 pruinosum gelu, fata, agrosque deuastet. Neq. iam
 in arua tantum, aut sulcos sepium antea ignaros, atq.
 aperta innocentia securos; sed in suum dominatorem
 (quem tremere aut sequi solebant) truculentæ è lati-
 bulis feræ prodeundo sæuire. aut si quæ mitius cogi-
 tant, tamquam serui fugitores, atq. imperium detre-
 ctantes, horrere, & auersari. Nihil idem, immune
 nihil aut intactum; nihil non suo vindictæ flagro
 percussum, atq. iusto pœnæ vulnere afflictum, hæsu-
 ræque iugiter natorum natis cicatrice deformatum.
 Ille ipse concordissimus nexus, quem Deus iunxit,
 nulla hominum temeritate laxandus; tametsi (quod
 præcipuum in se Diuinæ prouidentiae nutum ostendit)
 in antiqua firmitate persistit, haud sua tamen caruit
 tormenti lacinia, cum tristi illa denunciatione: In
 dolore paries filios. Quod si hunc ipsum dolorem,
 non qualem naturæ necessitas puerperis imprimit; sed
 profundiori sensu ad Regnantium Fœminarum eni-
 xus, Domosq. Augustas læta sobole propagandas
 traducimus; confessum sanè, probatumque nimium
 crebris

crebris quotidie experimur periculis, non vtero eas gerere aut parturire, nisi præuio dolore gentium; nisi orbis diu compressi, atq. afflicti onere, ac labore; nisi longa gementium populorū defatigatione, atq. ærumna obstetrice. Quot anni præstruuntur bellorum, vt vnus nuptiarum articulus ædificetur! quot humanæ societati repudia per infestos gladios mittuntur, vt vel vnus thalamus regali thoro componatur! Hac etenim nescio qua fatali intemperie in magnorum conditionibus hodie transigitur; vt nisi per apertas Iani fores ad Viriplacæ puluinār^{non} adeatur. Libitina pronuba, & Marte parario publica malorum dos ante dicatur, ad Regias dein virgines collocandas. furiales irarum tædę sanctis Hymenæi facibus præluceant. per Allien-ses tantum & Atros ad festiua repotia transeat. vilia sint flammea, quæ cruor hostilis non tinxerit. ac non nisi post detritos diutina militia baltheos, puellares tandem zonæ soluantur.

Sed quando supremus iam annuit rerum omnium moderator (in cuius manu & arma sunt, & Regum caducei) vt nocentissima irarum incendia, quibus nuper conflagrabat orbis, remiserint; turbulentissimæ aut bellorum, aut seditionum tempestates, quibus pulcherrima terrarum pars, Europa hæc nostra agitabatur, resederint; felicitatem sæculi extollere, beatitatem temporum prædicare, generis humani bonum effusè, atq. impotenter gratulari par est. Vos autem inclyti Reges, Vos Christianę, & Catholicę Ecclesię Maximi Filij Matri cognomines; Vos Mundi columnina, geminiq. Atlantes, quorum humeris vel iunctis vel discordibus, sic fata mortalium aut turbida, aut serena reguntur; Vos anhelò iam Orbi expectatissi-

tissimum opus partæ pacis, ac securitatis, vestra nuptalitij annuli impressa fide obsignastis. Penè iuuat audax verbum è pectore elicere: tam multas irarum, malorumq. causas hac mercede placuisse, vt in fere-num hunc amoris, & fœderis statum renouata Euro-pa coalesceret. Quæ ærumnis quamquam cædibus-que confecta, affatim instaurari videbitur, funeraq. sua, ac mortes redimere, si multiplici Heroum sobo-le Dominatrices vestræ Domus propediem replean-tur. Quemadmodum verò altioris sphæræ vertigo non ducitur, quin orbes quoq. minores impellantur ad motum: ita ad splendidissima Vestra connubio-rum auspicia reliquus excitatus orbis, quid præter nu-ptiarum consilia tam breui compleuit, quid captat nunc, quid mox agitabit? Quò Irides suas nunc ve-rè pacificas, terrestres loues delegant, nisi vt placi-do tranquillæ arcus incubatu coronata capita in mari-tale fœdus coniungant? Aut quò festinant Mercurij magnorum arcanorum interpretes, nisi vt concilia-tores agant, & auspices? nisi vt formulas concipiant iucundas, pactisque dotalibus leges dicant facundo ore gratissimas? Si quæ autem Domus imperio nata communibus hisce se se implicans gaudijs, è regali-um Hymenæorum face dissilientes veluti scintillas conser-to splendore suscepit, vna hæc Etrusca est. Si quæ gens publicis sollicita officijs, ingentis voti reatum gratulabunda osculatur, vna hæc Etrusca est. Si qui Principes nubilibus dextris corpora, animosq. ritè, augusteq. oppignerarunt; altissimis fortunæ splendori-bus, quæsitissimis naturæ donis, cumulatissimis virtu-tum, felicitatum, laudum titulis omni æuo celebran-di, suspiciendi, inuidendi, Vos Etrusci COSME,
&

7

& MARGARITA, Sponsiq. fidelissimī estis.

In tanta rerum secundissimarum amplitudine ; in tam apparato exuberantissimæ felicitatis commercio ; in tam iusta certa. publici boni æstimatione , & in cremento , quis aut silentij in ore , aut lætitiæ in pectore inofficiosum sibi imperet modum ? Delinquit sanè in leges viuendi , atq. humanis bonis proteruè iniuriosum se facit , quisquis continere se nouit. Ego verò , qui Vestrisvb syderibus nascendi beneficium sortitus , priuatæ ad hæc pietatis , & obsequij gloriam circumfero , filebo tandem ? nec voces procurrentis iustissimè in plausum animi mei indices , felicitatum vestrarum interpretes , Etruriæ nostræ inusitata , summa. gratulatione triumphantis , assiduas , atq. incorruptas testes emittam ? Quamquam haud ita demum pleno concipiendi gaudij impetu ferimur : nec toto perfruendæ voluptatis cursu prouehimur . Agnoscimus suaue infortunium , & fauorabile malum : quoniam sine vllō gentis dolore , sine vlla acuendæ lætitiæ illecebra ; non per sæua , & aduersa ; non per cædes , & sanguinem , ad hunc nuptialis iucunditatis sensum , temporisq. tam sereni vsum peruenimus .

Quis enim ignorat fortunatissimæ prouinciæ sortem , quæ vel in medijs fluctuantis Italiæ gurgitibus , altam inconcussi status malaciam retinuit ? ac furentibus hac illac periculorum turbinibus , vt illa sub dio antè Veneris Arcadicæ templum appensa lampas , in extinctæ quietis splendorem securior adnutriit ? Aut quis hic non videt (quod inuidere tam multi debeant) Vbertatis falcem cum Iustitiæ gladio feliciter iunctam ? Suos hic dominis agros seruari ; suos agris retineri cultus ; suam quotidie cultibus gliscere industriam ?

striam? quis non singulis, & vniuersis sartam te-
 ctam Rempubicam, iucundum Fas, saluum Hone-
 stum non violato tenore constare? Tu Ferdinande,
 Tu ille sinceri gaudij auctor, & custos, cui tam ex-
 cellentium bonorum vsuram debemus. Tui muneris
 est, si Tyrrheno in littore quasi tempestatum igna-
 ro Alcyones securitatis suum iamdiu nidum compo-
 fuerint. Sanctissimis Tu illam seruare legibus, qua-
 lem liberis optimus pater seruat, omni tempore stu-
 disti. Tu quæ alios ad bellum incendissent, aut
 falsæ gloriæ, aut præmaturæ cupidinis tentamenta,
 publicæ donans tranquillitati, vnam egregio in sinu
 fouisti. Parta, & accepta possidere, quàm Tuo-
 rum discrimine amplificare, Principe dignius sem-
 per existimans. Nec tamen fines tuos haud contem-
 nenda limitum margine ad Macram vsque promoue-
 re, diues magis an prudens desijsti. O raram verò
 gloriam, vbi opus extitit, vbi etiam erit, parem bel-
 lo, sed toga meliorem se se probare; neq. arma mo-
 uere, neq. mota extimescere; & in sapientissimi ta-
 men pectoris comitio tuendæ numquam non Paci
 suffragari. Coniuncta alios formidandis classibus
 freta, frementes in aciem ductæ phalanges, numero-
 sa hostib. adempta spolia, catenis tracta miserorum
 agmina, confusus omnibus cruor, cumulati cada-
 ueribus campi, conuulsa mœnia, strati aggeres, per-
 ruptæ arces, expugnata, incensa, direpta oppida,
 ad Cælum propè tollendo, in ipso (vt loquebantur)
 Iouis folio tandem constituerint. Quanto illud, o
 quanto præstabilius, ad melioris sapientiæ præscri-
 ptum, ad humani generis incolumitatem, ad diuinæ
 præceptionis obsequium, togatis studijs ita se gerere;

vt

vt (quod rarissimè bella sinunt) sua stet legibus
vis , iudicijs auctoritas , artibus pretium : sua paren-
tibus dignitas , liberis honestas , moribus fides , ciui-
bus salus , sacris veneratio retineatur : cunctis verum
numen , & prouidentia , & maiestas præsideant .
Hæc florent , hæc vigent , hæc æstimantur sub Te
Ferdinande . Tui hæc sunt prudentissimi regiminis
decora nullis vnquam reticenda litteris ; nullis tamen
pro eorum magnitudine satis æquis dicenda monu-
mentis . Facebant hinc perniciosi isti bellorum in-
stinctores : qui pretiosorem sæculis tunc fore augu-
rantur Principis famam ; quò viliores ille humanas
animas per vefanam Martis lanienam habuerit : qui
ex Orci tenebris , atq. alto Lethæi gurgitis sinu e-
mersurum ad posteros nomen promittunt , quò plures
ille ad manium sedem , & busta Parcarum , profun-
damq. lethi voraginem præcipitata fatorum neces-
sitate cruentus dimiserit . Egregia me Hercle lauda-
tio ! qualem brutis fulminibus tribuere prorsus con-
sueuimus ; quorum brevis fulgor , & fragor inanis
contemneretur , nisi stragem post se , ac funera ; ni-
si fumantia cadauera , & luridos artus , consepultosq.
ruina penates relinquerent . Quidni illud cõtaminatissi-
mi Romanorum Principis subinde repetant ; malè
secum agi ob rerum prosperitatem condolentis , quo-
niam nulla tunc infortunia , nullæ malorum immitte-
rentur procellæ , quibus nomen quoq. suum per ea
calamitatum dicenda posteris tempora memorabile
magis increbresceret ? Ament interea quicumq. ve-
lint parta terrore agnomina ; qui Poliorcetes , &
Cerauni , & Flagella , aut noxium magis aliud in or-
be audiuerunt . Ornent Te potius Ferdinande pa-

cis vocabula ; quibus , & Pius , & Euergetes , & Iustus , aut aliquid amantius aliud nomineris . Feroci demum iactatione se efferat Magnus ille , qui innumeros statim exercitus aduersus Cæsarem nascituros fore comminabatur , quoties pede tellurem pulsasset . Suauior , digniorq. gloriatio Tua Ferdinando : quacumq. oculos , nutumq. moueas indulgentissimum , placabilitatem ibi , ac beneuolentiam enasci ; aut si qui exercitus , & agmina , ea gratiarum , & amorum congregari . Atqui studiosum omnino hunc Pacis animum tuum ; nec insolentiae , aut peruicaciae , sed beneficio , & amoris natum factumq. nemo non fateatur : quisquis incredibilem illam comitatem Tuam , omniq. exemplo , laudeq. maiorem mitissimi alloquij Serenitatem nullo Principalis Fortunæ detrimento blandam , suauemq. experitur . O nectaræas plane catenas , & dulcia vincula humanitatis ! O labyrinthæas demerendi artes ! quibus deuinctos , excantatos , attonitos plenè implicas , capis , abducis quicumque Te adeunt : atq. inaudita stupore lenitatis hærentes , dum discedunt , adhuc retines . Quàm hilari vultu , quàm obuia familiaritate , quàm facili , & facundo ore inuitas , & allicis ! quàm læto , quàm vario conferendi sermonis paratu admiraculum penè instructus moraris , & oblectas ! Quod enim est vspiam (per Tuum hunc amabilissimum iuro Genium) trahendi aut argutè , aut scienter , aut operosè colloquij genus , in quo subactus , ac diligens ; neq. pro Tua hac sublimi regnandi sorte , sed pro eruditi atq. ociosi professione non verferis ? Populorum mores , terrarum spatia , vires Principum , aularum consilia , priuatorum curas , acta temporum , orbis euenta ,
naturæ,

naturæ, Cæliq. arcana complecteris, loqueris, dijudicas. Hæc enim quoque pulcherrima ornamenta ad mitissimum illud Tuum Pacis ingenium commendandum accedunt, quòd in aulæ splendore, ac maiestate, rerumq. gerendarum tam multiplici serie rimandis potissimum philosophiæ latebris furtiua ocij spatia nobili studio interiungis. O illa Palatinæ domus (qua pulchriorem fortè vllam aut Italia, aut Europa non videt) planè digna fastigia, quæ attento oculo, & sedulo pede lustrentur. non quia superbo structuræ ingenio, magnifica ac perenni exstantium lapidum crusta, diffusis atque elatis spatijs, virenti nitore, irriguis delicijs, custode arce, mollique tandem imposita cliuo subiectam vrbem superemineant. Sed hoc equidem præminent Augusta, & laureata; quòd philosophantium, geometrarumque gressibus dum quotidie teruntur, in Musarum gynecæa, aut Musæa potius sapientum virorum, in experimentorum theatra, in naturæ officinam sub examen vocatæ, in rationis sensusq. vnà congregientium arenam demigrarunt. O verè sacra Phæbi domus! vbi Sol Etruscus Serenissimis cingitur fratribus; quos non tam imperij adiutores, quàm excellentium omnium artium, quibus vel mansueta, vel ferox se se Pallas commendat, egregios patronos, ac vindices, & appellare, & adgnoscerè non nisi ingrata ætas respuerit. Maçte hoc animo Ferdinande: qui è Maioribus Tuis Laurentios Magnificos, Leones Sanctissimos, & Maximos haud degeneri imitatione aut reducens, aut vincens, artes tam præclaras, ac Principe oppidò dignas ingenio complecteris, gnaritate inspicis, cura promoues, auctoritate intendis, beneficentia, manuq. aurea confirmas. Vt beatam

hanc esse Rempublicam nemo iam dubitet, quæ ex Platonis monito talem philosophantem regnatorem fortita fuerit. Amplissimis proinde, felicissimisq. natura eadem Te donis instruxit; suis quasi gaudens venabulis à Te capi, & indagari. Hinc etenim illa Tua mens altiori quodam heroico foeta spiritu, qualis rectorem populi decet. hinc acerrimum ingenium miranda celeritate efficax. hinc iudicium consideratissimum, cuncta tam vigilanter, tam accuratè coniiciens. hinc memoris facultatis præsentissima laus, quiduis tenere, complecti, reuocare indefinenter paratæ. Quæ singula propensi in Te Cæli, naturæq. dona diuturno vsu, atq. agitatione perficiens; dum per bina amplius Vicennalia ad onus imperij, rei. publicæ curam intendis, ita exercitatissimam prudentiam Tuam adprobasti semper; vt siue arduis difficultatem excutere, periculosis sollicitudinem demere confusis perplexitatem euoluere, dubijs lucem, leuamen asperis, incertis normam, solutis legem admouere oportuerit, nemo Te Ferdinande inter Cōsentes Tuos, aut perspicacia solertior, aut grauitate constantior, aut consilio maturior, aut prouisu sapientior, aut exitu atq. euentu ipso felicior extiterit. Quas quidem eminentissimas virtutum laudes domi natas, atque altas; per seminis Augusti traducem, paterniq. exempli fibram in Filio Cosmo latissimè prouenire, & adolescere; quàm hilares, quàm amantes, ac de magnarum rerum spe secuti intuemur! Cui Filio quem thesaurum, quas opes, aut potentiam, quodue dominationis fastigium illustrius adornare poteras, quàm hæc ipsa laudum Tuarum vestigia, atq. exemplaria proponens? Sicuti nobis nihil maius pro-

fecto

fectò dare beneficium ; aut de nostra fortuna amplius mereri poteris ; quàm Iuuenem tanti nominis olim heredem , nunc virtutis , & gloriæ Tuæ imitorem prospiciens . Nec Illi tandem , nec nobis ; quàm si Regiam^{us} Puellam (hæc vna quippe sollicitissima remordebat animos cura) tam digno Sponso auspiciatissimè copulandam repereris .

Ad te nunc me conuerto , de Te semper infra dignitatem locuturus Cosme Princeps Serenissime . Ad Te Regnatricis Domus primum columnen ac firmamentum : Etruriæ nostræ delicias , & Amorem : Italicæ maiestatis germen , floremq. lætissimum . Sed hoc tamen ipsum quia flores , Tibi forsitan vnum obest ingrato iuuentæ munere , atque iniurioso vernantium annorum rudimento . Quamquam crepundia ipsa Tua contemplanti mihi , ille statim blanditur excelsæ indolis radius , maximum in magna natis fortuna donum ; quod vt gratuitò in illos influit , ita è Cælo recta delabitur . Hæc est illa teneræ virtutis inaffectedata lux ingentium animarum nutrix , quam nemo vnquam iniuste collaudauit . Hæc illa incipiens aura ; quæ primo susurro extra portum inuitat grandiora nauigia , vt in altum mox cieat ad summa quæque prosperrimo cursu emetienda . Præiudicia sunt futuræ olim magnitudinis , quæ balbo ore concipiunt summis orti natalibus . Beati isti fortunæ pulli statim ab ouo , ne dum puerilibus è cauea tripudijs futuram portendunt amplitudinem . Sol diei princeps , ac luminum rector , etiam antè ortum officiosis vaporum humeris quandoque sustollitur orbi ostendendus . vt Solis eiusdem blandientem ex alto lucem implumes adhuc Aquilarum filij contemplari , ac sustinere gaudent .

dent. Hercules, ad cuius exemplar se componunt regnantes, infantili manu admotos in exitium angues exanimasse narratur. O Tuum, ac verè Tuum Cosme Princeps in magnæ fortunæ magna licentia, ne dicam peccandi impunitate, perque annorum inuitantium dulcedinem, paratos vndeque colubros, atque horrenda monstra vitiorum forti nixu comprimere. Quàm crebra interim, Deus bone, quàm iucunda regnantis adolescentiæ pericula, suoque sæpiùs veneno indulgens in ea ætate potestas! O viridarium isthoc amœnissimum, quod fontibus scatet illecebrarum, rore mollitur securitatis, imbribus madet voluptatum, susurris mulcetur blanditiarum! quàm rari qui ad solidos virtutum fructus, plenamque sapientiæ maturitatem perueniant. Verè hic insidiosi cubant angues inter florum delectamenta. Quòd si infanti illi Thebano truces nouerca immisit, quibus necaretur serpentes: Tibi ne accederent, aut obessent vitia, Mater fecit Victoria, felix nomine, sanctior exemplo. Debebas quippe domitricem illorum clauam non vt Hercules, è Tyrio nemore; sed è Feltrio monte maternæ quercus felicem furculum decerpere: O auream plantam Ioue prorsus, & Saturnio sæculo dignam! cuius vmbra pulchritudo est; cuius fructus tot illæ sunt tantæque pectoris, oris, ingenij virtutes, quot quantasue in sæminā Principem congestas, vniuersus fermè Orbis deprædicat, aliæ ætates rarò viderunt, futuræ vix credant, summo nos Dei munere cumulatifsimè experimur. O vos Mediceæ Domus fortunati postes, quos tam beatæ frondis fertum virens coronat. Sub hac tam inclyta Quercu matura virtutum nutrimenta, vitæque innocentis educationem collegisti: Christianæ

stianæ potissimum disciplinæ veneranda oracula (vt Dodonææ olim Quercus reddebant) plenè ritèque accepisti .

De alijs narrent alij, quæ, & quanta libet cumque auditu magis speciosa, dictuque magnifica. De Te quoque Cosme, cùm Deus olim (ò faxit) diutissimam mortalitatis stationem Tibi indulgebit, non deerunt, qui fortia, audacia, magnanima referant; vbi ætas, & occasio campum tibi famæ prosternent amplissimum. Mihi verò abundè suppeteret, quòd innutritam bonis artibus adolescentiam tuam; Suadæ, & matheos studijs perpolitum ingenium; quid gefferint, qui loquantur, remotæ sæculis, disiunctæ regionibus gentes, edoctam linguam atq. animum cum laude nunc commemorarem. Sed vnum exosculari placet, ac veneratione prosequi maximum adolescentis Principis ornamentum. quid adolescentis? quasi puerile, & fæmineum. aut quid ornamentum? Imo præcellentissimam, ac triumphalem laudem; cui fasces suos cæteræ omnes submittant: sanctius virtutum ærarium quo è solo veræ opes, ac præsidia ad benè, diùque regnandum educuntur. Solidum pietatis studium, mancipatumque Deo religiosissimè cultum, hunc intelligo, hunc deprædico. Hæc est illa Tui magni pectoris inquilina virtus, omnium horarum fida, atque inculpata comes: hæc altum columnen, atque inconcussi fastigij: hæc fons inexhaustus: hæc mater veneranda, plenique vteri, quæ tuis castimoniâ verbis, cogitationibus sanctitatem, moribus innocentiam focundissimè peperit, largissimè infudit, firmissimè stabilivit. Hæc omni ævo felicem, potentem, inuictum Te faciet. Hæc Tuis amabilem, ciuibus carum, exteris suspi-

cien-

ciendum, regnantibus exemplum, ac penè dixi conuicium præstabit. Scio etenim quæ plerisque infideat altè hærens in animo persuasio. meticulosas fieri mentes, nimiùmque alligatas, gerendo fortiter, audendoque impares, quas præfractus hic, & ad normam exquisitus Numinis cultus imbuerit. Priuatorum est (inquiunt) & humilium sollicita hæc, & anxia Pietatis tutela. Securiori consilio se vindicant reges; quibus eundum quò vocat, aut cupidinum voluptas, aut dominandi vsus, aut votorum licentia. Sed sua sibi reforbeant malè hauista præcepta prophani isti, atque vlcerosi aularum Polydamantes. Lutulentas illis, quas non moror, sententias infusurret in aurem Ægeria Impietas, & Iupiter non Capitolinus, sed Atheos. Aliter mihi suadet mens, naturæ dicat ratio, sapientum consensus, proborum auctoritas. Primum sit regnandi elementum metus Domini. Nunquam scilicet aut generosiùs, aut fortiùs metuimus: indigni quos vllus nos amet, aut metuat, nisi ita metuamus. Eodem Diuino Numine vitas mortalium inuisi subinde horreamus; cuius vltorem gladium nemo vnquam nocens effugit; aut remunerantis manum nemo iustus iniustam agnouit. Non subornari illud gratia, non fraude circumscribi, non ambitu aut potentia hominum permoueri. Quoties ei libuerit, fasces ac sceptrum flammantibus sarmenta vrbibus tradi. Purpuras, & chlamydes quasi ludibria, aut pilas irruentium ferarum exponi. Solia, & curules in feralia pegmata, & suggestus carnifice terendos recudi. Fecisse illud cuncta; cunctis præsidere quæ fecit; etiam minimarum rerum curam gerere; suauissimo vniuersa imperio moderari. Sed hominem præci-

præcipuè carissimum sibi animal mente donatum diuinitatis particula, ad immortalis æui fruitionem erigere, gratiosissimis legibus, ac præsidijis instructum, quæ violare, & contemnere, nefas, ac piaculum sit. O illi parum sani, si quibus persuasum est, aliud pietatem, aliud dictare naturam: alia semita potentiam, alia conscium recti animum incedere. Liquamine, si ita placet, ex hara Epicureorum desumpto, suum inungant regem, quicumque velint. Egregium, Hercules, populi censorem, morisque, & virtutis magistrum in aureo iustitiæ folio collocabunt. Me autem non fugit Francorum Reges, certissima nempe perfectæ dominationis exempla oleo cælitus demisso inaugurari antiqua religione consueuisse. Neque coruorum, aut vulturum rostris; sed purissimæ columbæ alis subiectum chrisomatis vas descendisse, quo olim inungebantur: insigni documento, quemadmodum, & Cælum, & innocentia maximè Principes faciat. Quos non dubitet iam vllus tamquam simplicitate delibutos improborum, ac versipellium consilijs opportunos. Nemo enim acrius deprehendit, aut immitius vindicat quàm qui maximè extra labem reperitur: vt nebulam ac fumum ij potissimum vident, qui illinc longiùs recedunt. Ac vitij nemo itidem formidolosior institit, vel tardior pepercit, quàm qui suspicione absolvitur, ne sua causa ignouisse videatur. Num verò tandem lentus, ac socors in turbatores ac nefarios non vigilabit ille, cui nihil tam cordi est quàm inuiolata sempiterni legum auctoris maiestas? Non ferox, non impiger audebit ille, cui vires commodat, atq. animos facit fortitudinum Deus? Non arma in perduelles mouebit intrepidus, ac vindice

ictu sceleratos prosternet, cui fœderatum terris æther, stipendia syderum colligit? Inter serenos fluentium rerum successus, obsecundantis fortunæ insidijs latus aperiet, potentia sæuus, luxu marcens, voluptatibus fractus: aut inter aduersas irruentium calamitatum procellas periculis cedit, metu corruet, dolore intabescet, qui vnico incontaminatæ conscientiæ fultus munimine, perinde habet quæ auctore Deo, aut recedunt, aut veniunt? Non Iustitiæ promendæ sanctissimum opus, nullo studio, aut arte violandum: non publicæ salutis seruandæ supremam, atq. inuiolabilem legem: non pacis, honestatis, amoris beatissimam inter suos coniunctionem, perdius ac pernox curabit ille, qui ab ore sapientis didicerit, talem se esse oportere ciuibus, qualē sibi Deum fore concupiscat? Sed longiùs fortasse (iam video) in hunc orationis anfractum fallente sensim vestigio me prouexi: Tu verò Cosme Princeps in hac pietatis laude profusus etiam, ac multus. Neq. aliunde enim illa charitatis affectio, qua prodesse cunctis, ac benefacere studes: qua saluam cuiq. dignitatem, ac nomen exoptas: qua calamitosos, ac tristi necessitate collisos, aut voluntaria innocentioris vitæ paupertate deiectos, non miserari tantum, sed fouere, ac subleuare consueuisti. Nec exacta illa verecundia, & obsequium in maiores Tuos; nec pudor, ac modestia cum omnibus, qui circa, vel infra Te, nisi ab eodem pietatis fonte dimanant. Cui tandem pietati vltimum honoris complementum defert Tua illa constanter impensa Sacris veneratio, sacrorumq. custodibus reuerentia ac (si quid eximiè aliud) de animi candore, quem nulla culpa-

rum

rum labes cōquinet, attentissima cura, ac solici-
tudo. Non est itaque cur admirer nunc illam fron-
tis dignitatem, maturæq. grauitatis lucem, quam ubi-
que circumfers; radium scilicet, quem internus ille
purioris animi candor depingit in vultu. Gemma hæc
ponderosæ honestatis nihil humile, aut resolutum eie-
ctans, vna est quæ coronatos vertices exornet, ac
fulciat: Aut virtutum tribu decor hic est mouendus,
& in Cerites ineptiarum tabulas amandandus: aut si
quibus mortalium conuenit, verè dignum Principibus
ornamentum, certumq. illorum esse peculium nun-
quam non censui. Atqui nota hæc maiestatis superci-
lio inscripta suauiter, pulchritudoque auctoritatis in
tota facie, corpore, gestu viriliter constans, fidem quo-
que facere solet, pretiumque sapientiæ ante annos ve-
locis: quæ si in alijs præmatura habeatur; regnantium
vitam hæc penitus ornat iucunda seueritas. Anticipa-
to grauitatis officio cum bulla, & prætexta sapere, ac
senilem moribus spirare canitiem ne illos pigeat, qui-
cumque non sibi, sed alijs viuendo, vnum annum pro
tam multis numerant, quot illi sunt; ad quorum felici-
tatem, ac salutem excubare, commissæ sibi potestatis
vti optima maxima lege tenentur. Errat quisquis an-
naria lege Principum vitam aut metatur, aut æstimat.
Præcoci gloria maturescunt illis virtutum fructus in
flore. Consenescent ante diem; ne vllis vnquam sæ-
culis eorum fama veterascat. Sed & publici amoris
pulcherrimo interim fœnore eorumdem vita pensatur:
quoties Deum precamur, de nostris vt illi annis re-
fundat annos. Sapientia Principum nutrix ante om-
nes montes, & abyssos genita, quamlibet teneras illo-
rum frontes canis inspergit consilijs: quoniam & illius

vbera cogitationum rugas cum primo lacte perstillant. Verè enim si curarum molem, atque officij pondus expendant, quod imperando subeunt; tunc demum suo erunt digni munere, ac nomine, cum seria non ferro tempore agitabunt. Haud aliter ille in scena ludio, Achiuorum Regem, vt ostenderet magnum, cogitandum effinxit.

Ad senij mentionem, inuisum planè inter nuptias nomen, ne amabilem vultum Regia obnubiles Virgo. De virtutis senio loquimur, non de annis: quos florentissimos in Sponso cernis, virenti corporis robore, nec vulgariter decoræ pulchritudinis maiestate assurgentes. Frontem vides nigris spectandam oculis, nigram, ac pinguem Cæsariem, qualem tua præscribit Gallia profusè depexam. Artus vides torosos tenaci virium lentore compactos: procera molem staturæ firmiter superstantem: faciem denique vides, atque habitum totum, illo dignum imperio, quod in recessu nuper animi contemplabamur. Fidus pudicitiae sequester permisos tecum amores Tibi vni seruauit: delibata non dum oscula Tibi imprimet: Te amplexibus nemini datis inuadet. Neque verò seria illum meditantem extimueris. Hæc amantium natura est, quos clauo cogitationum defixos tenet Amor in eam, quam depereunt. Ac de Te forsitan ille cogitabat: de Te inquam potiunda sollicitus, quam tot regibus dignam procis, procorumque vota omnium altissimis supergredientem titulis ambiisset.

Quid enim paterni, materniue sanguinis inclyta, augusta, immortalis stirpe generosius? Aut quid maiestatis, ac fortis amplissimo per orbem illustramento splendidius? Vel quid tandem congestis naturæ
dotibus;

dotibus; atque in omnia cū animi, tum corporis bona prolixè conspirantis, patrimonio beatius Tua illi tradere poterat Gallia, quā Te Aurelianensem Margaritam tradendo? Te verò dein tradita: quid vel Etrusco Principi, quod magis, expeteret; vel eidem Galliæ, quò superbiret magis, nisi Tui simillimas retinendo, supererat? Suum quondam iactauit illa Herculem, aut regem, aut sapientiæ magistrum. Digna equidem natio, quæ Hercules omni tempore aut gignat, aut faciat. Quòd si Iunonem Gallicam fando memorari adhuc non audiuius: ego Te hodie Regiam Sponsam tam digna, tamq. apta nominis maiestate contemplari, & ostendere minùs dubito. Sed Hercules ille (qualem vetustas depinxit) recaluaſter ac ſenex erat; rugoſa ac lurida cute peruſtus; denſa pectoris, & alarum illuue deformis. Te in primo nubilis adoleſcentiæ riſu venuſtam, compſiſſimis deliciſam capillis, atq. amabili genarum fulgore conſpicuam Etruria demiratur. Ille toruos oculos rigenti ſuperciliorum ſcabritie inumbratos, lentus, & obliquus mouens. Tu ſplendentes ac floridos, quaqua verſum in communem lætitiā vigiles decentiſſima ſerenitate circumfers. Ille ſetofis humeris leoninas geſtans exuuias: pendulo atq. hianti belluæ capite, quod dentes horrificant etiam truces, ac metuendi poſt mortem; nec minus cruenta iubarum inſuſcat putredo. Tu nuptiali cultu formoſa, ſyrma trahis eximio auri, gemmarumq. nitore diſtiſſimum, blanditiem ubiq. pariens, & gaudium: nec terrore, ſed gratia maiestatem quacumq. ſeris, ac vindicas. Aſperis ille manibus clauam hinc nodofam perſtringit mactatis foetidam monſtris: il-

linc

hinc sagittas ferarum sanguine non dum siccatas protendit. Speculum Tibi, puellare scilicet anathema tenera in manu deponerem; si quid vel eius consilio Tibi pulchrius in vultu, si quid fieri posset censura emendatius. Sceptrum regiae fortis gestamen planè deceret; nisi scirem apud Te plus in animi virtutibus quàm in dextræ officio eminere. Ergo manui Tuæ fidissimam Sponsi manum inferamus: quæ Tibi pro speculo, pro sceptro, pro æternitate contingat.

Quòd si de illo Heroe Celtico narrant, innumeros ab eo mortaliū cœtus prædabunda quadam, atq. efficaci vi quacumq. vellet, fuisse pertractos; hoc Tu equidem Tuo non dispar Herculi, æmularis illum, aut vincis. Tu enim corda sequacia: irretitas ille aures trahebat. Habenulis ille ex auro, atq. electro: Tu adamantinis, quas publicus fecit amor catenis, vt omnium fortissimis, ita beatissimis vinculis ligas. Promiscuas ille atq. inconditas turbas. Tu orbis procures, ac lumina gentium captiua ad Te vocas. Lingua ille in summo traiecta, vnde nexiles emicabant voces ad præsentium, audientiumq. rapinam: Tu siue taces, siue loqueris, non lingua tantum aut sermone: sed oculis, vultu, nutu studia in te omnium, venerationemq. circumagis. Neq. modò eos, quos Tua hæc nihil referens morituri afflat præsentia, conuertis ac permoues: sed remotos longè ac disiunctos, quæ laudum tuarum amplissimè honor vagatur, aut inclytæ, inuictæ, æternæ Tuæ Domus (vbi cumq. sol currit ac dies nitet, in vltimos fugientium terrarum defectus, abditosq. recedentis Oceani sinus) fama nomenq. infinitè diffunditur. Atqui hæc vna maiestas Gallici nominis, Tuoque
tam

tam excelfo sanguini copulanda fortuna (si quid aliud)
 procantem Etruriam pertraxit. Arcana quippe do-
 minationum consilia, quæ turbam fugiunt, coniu-
 ges sceptrò potentes in maritæ fidei sacramenta san-
 ctioribus vinculis ligant. Non illos perituræ pulcri-
 tudinis fulgor, aut gratiæ decor senescens; hoc est
 Volgiuagæ Veneris cestus; sed Cælestis, atque He-
 roicæ cingulum ad voluptates implicat angustiores.

O qualia mihi nunc dicendi spatia se se traderent,
 quantusve emetiendus laudum pelagus foret: si in
 antiquissima Gallorum regna, clarissimas Prouincias,
 fortissimam gentem, populos omni æuo Florentissi-
 mos, memorem, paremque iactare sermonem suade-
 ret spes atque animus; vel suscepti demum operis ra-
 tio flagitaret! Compendium sit narrationis Celtas
 appellare: & summa laudationum Galliam dixisse.
 Illam, quam quo nomine perhibeam, Europæ ne
 pupillam, an Orbis animam, vel rebus gestis immor-
 talibus selectam Cæli portionem in terris, prorsus
 ignoro. Quid refert nunc priscos illos fabulis immi-
 xtos Gallorum Semones, atque Heroas recensere, ut
 inuictæ nationis bellicum omni tempore studium,
 Imperijque militaris claritudinem suis è fontibus rete-
 gamus? Si Romana tempora inspicimus vigente du-
 dum magnis exemplis Vrbe, ac Rep. adeo nominis
 Gallici terror vrgebat: ut cum Martius ille populus
 ad propagandos alioquin Imperij terminos, gloriæque
 dilatanda pomœria vitricibus signis conuolaret; quo-
 ties Gallica concrepuissent bella, pro aris ac focis
 tutandis, pro salute, fortunis, liberis seruandis, per-
 missa nemini militiæ venia, se se pugnare suis inclu-
 sus finibus profiteretur. Hinc, & Asiæ, & Orientis
 Regibus

Regibus Gallica arma expetita, summoque studio, ingentique mercedē ad partes adducta : quasi eorum accessione certum victoriæ momentum incuteretur ; ac triumphus illinc faciliè staret , vbi Celtarum manus non defuissent . Quorum proinde pectora mortis quidem capacia , sed mortem pauere insolentia , nullis natura edomare periculis , atque in ordinem cogere poterat : quibus maximè mortales , ad æstuantis Oceani voragines, subsidentis terræ tremores, dehiscientium Cælorum fremitus atque ignes concuti , ac percelli solent . Quamquam illud vnum horrebant tamen , ignominia maculam , ac dedecus in bello , fugam (quàm qui maximè) in eo cauentes , ac fugitantes , cuius ne comperti aut suspecti turpissimam sibi notam imprimerent ; vel pedem illinc referre abnuebant , vbi stantes , certa illos ædium, turrium, aggerum ruina , stragesque mansisset . Ex hac intrepidi animi toruitate constans illa in acie firmitas, semelque addictæ fidei erga duces , ac rectores peruicacissimus tenor ; quam domi quoque , atque inter suos indeprauatam, penitusque infrabilem retinebāt . Celebre in litteris perdurat adhuc nomen Solduriorū, deuotum apud Gallos genus hominum , qui Procerum alicui se mancipientes , in omni sorte , per secunda, per turbida pertinaci obsequio patronum conitabantur ; nunquam se saluis sacramentum fidei, aut clientelæ exuentes . Quòd si fato is concessisset, gloriosum quoque isti sponte subibant interitum : condignum eo pacto addictæ obseruantia pensum se absoluerē opinantes, quoniam ille mortalitatis iam peregisset . Didicerant, didicerant à suis sapientia magistris , quos memorato scriptoribus nomine Druidas appellarunt, nihil

nihil fide religiosius , aut sanctius apud mortales habendum : oppetitam impavidè mortem clarissimum renascentis famæ diluculum fore : patrijs moribus obtèperandum , quos fortitudo , ac virtus imperasset . Hos etenim Druidas antiqua venerabatur Gallia tamquam doctrinæ duces , sacrorum magistros , publicæq. felicitatis monitores . Ab his , & Gallia , & exteræ gentes Galliam impenso studio adeuntes , religionem , cultum , litteras , rerum diuinarum , humanarumque notionem percipiebant . Vt sicuti armis , & audacia cæteras omnes facile vincebat vel clarissimas bello Provincias ; ita institutionis , ac disciplinæ gloria , neque suos Orienti magos , ac Gymnosophistas , nec Græciæ Sapientes Gallia inuideret . Atque his artibus cœpit , stetit olim ; crescit quotidie , ac peruagatur illustrius Gallicum nomen . Ex hoc pulcherrimo connubio : hinc militaris virtutis , qua hostes vincere , populosque longè latèque in ditionem redigere : hinc doctrinæ , ac sapientiæ , qua ciues regere , & ad honestatis , pacisque leges informare didicit ; immortalis illa apud posteros fama , admirandumque potentiæ pignus enatum est , longa deinceps , felicique regum suorum dominatione contextum ; quantam equidem aut duratione , aut amplitudine , aut firmo neminiq. obnoxio regendi arbitrio nullæ gentes aliæ , vel condendis imperijs , vel retinendis gloriosæ , concupiscere , & adspirare , ne dum ostendere queant . Sed ferè ita comparatum est , vt non alio vtantur foro , & possidendi sceptræ vsus , & demerendi iustitia . Vt larga mæsis commendat agricolam , & loci salubritatem longa indigenarum ætas demonstrat : ita populorum custodibus , publicæque incolumitatis ducibus vna ,

D

eaque

eaque summa laus adhæret , diù , ac fortunatè præfuisse.

Arduum mihi, atque operosum nimis foret longam eorum omnium nomenclaturam euoluere (vt famæ erit semper res gestas proferre) qui post excussum quondam Romanæ potestatis iugum, regij nominis titulo Gallijs ad hoc vsq. æuum imperitarunt. Tot namque numerantur, quot natura annos impertire nobis non solet, quin lassi, ac longo cursu penè fatiscentes, ad vltimum vitæ flexum iam iam promineamus. Cùm tamen Gallici imperij nunquam consenscens maiestas, illustrioribus maximarum rerum exemplis, amplioribus fortunæ, ac felicitatis præsidij, firmioribus potentia, ac dignitatis culminibus quotidie iuuenescat ad gloriam. Vnus verò è tam multis, non Gallici tantum diadematis fulgore me trahit; sed Cælitus tracto virtutum sanctissimarum lumine ad inusitatæ admirationis obsequium, & animum, & linguam meam penitus rapit. Post quadraginta plus minus reges augusta Fastorum ratio illum conscribat. Ego meritorum amplitudine, ac virtutum excellentia, cui nullam parem, aut proximam humana nouit fingere ambitio, primum, summumque libentiùs adnumero. Non indiges (scio Ludouice) inanibus hisce nostris laudum fertis, quem in Diuos transcriptum pleno ambitu sidera in Cælis coronant. Gallis Te vixisse regem humanæ magnitudinis maxima pars habeatur; maius tamen multò, Sempiternæ Hierusalem Te esse tribulem. Quia bellicosus, & pugnax, & præliorum cupidus, Gallis placuisti: sed magis Deo, in cuius honorem, sacrosanctæque fidei tutelam pias vires expediisti. O nobiles

biles curas, & dignos regum studio conatus! Non arma in ultionis, atque odij experimenta componere; sed Diuini ingenus humanū Amoris paciferæ propugnandæ legi commodare. Neque perituram in terris portionem bello promouere, aut partiri; sed immortalem cælestis hæreditatis sortem legitimè certando emercari. Quòd si quæ tamen Ludouice de humanis hisce lætitia Te afficit: aut vllus rerum nostrarum sensus beata Cælitum corda permulcet: gaudes, opinor, ortam ex Te Gentem Borboniam in tam sublimi potentia, atque honoris specula suspicienti Orbi explendescere; dignasque Te Parente, & Satore virtutum heroicarū fruges noui instar Triptolemi è curru triumphalis gloriæ vsquequaque diffundere. Ignosce mihi Serenissima, & Augustissima Gens; si altiùs inuestigare, ac repetere vetustissimi Tui Sanguinis scatebram supersedeo. Satis videbar fecisse, si è Cælis, sanctissimo videlicet Ludouici gremio deducerem: in cuius filium Rupertum recto stemmate, longoque ordine inuictam originem, ac veluti consecratam Borbonij refertis. O vnica, ac gloriosissima fundandæ stirpis auspicia, nobilitandæque instrumenta, & ad feram, certamque dominationem transmittendæ præsidia; fasces illi, caputque coronatum pio corde submisisse, per quem reges regnant, ac tyranni terram tenent. Eximiam altæ natiuitatis sortem Quirites iactent, quia crebris visendas imaginibus atriorum ceras imaginosa prorsus nobilitate circumferant. Genitiuam honesti sanguinis notam Seleucidæ ostentent insculptam femori anchoram: aut lanceam brachio ingenitam alij commostrent. Hoc signum, hæc fides Borboniæ propaginis; hæc geniuna amplissima in terris Familiæ tes-

fera, ac specimen, Crucē in pectore, in brachio, in corde gessisse, atque adorandam illius imaginem præeunte Ludouico in barbaros circumtulisse. Partam igitur tanto progenitore amplitudinem meritò nunc possidetis Borbonij posteri; atque ideò tam altam, tam firmam, tam orbi verendam, quoniam à Cælesti fauore, Diuinique Numinis cultu incoepistis. Hinc fusa per tot Galliarum Prouincias, tot Principatuum fascēs, tot regnorum commercia, & quod maius est, tot grandes Heroum animas Propago Vestra: donec coniuratis gloriæ, ac virtutum incrementis, fortunæque ac felicitatis beato quodam impetu prouecta, in communem potentia cursum, hinc Nauarræ, hinc Franciæ Regnum copulauerit. Vt enim Macedonia suum olim nō capiebat Magnū; ita angustis Nauarræ finibus amplissimū Franciæ Regnum erat adiungendum, ne maiora agitandi Magno deesset Henrico potestas. Cui mox vtrumque suffecisse regnum non adeò visum est, quin prostrata rebellium perfidia, edomita ac protrita hostium superbia, propagatis terminis, adiectis Prouincijs, angustiora, atque optimis legum, viriumque præsidijs feliciora Ludouico Iusto paternæ claritatis heredi, atque æmulatori tradiderit. O pulcherrimum virtutum foedus, & auream prorsus societatem, ac veluti maiorum syderum coniunctionem, Magni, atque Iusti! O Gallijs gloriosa, Reip. salutaria, Orbi optabilia, Regibus summè expetenda cognomina! O prolem beatam dignissimi parentis, Iustum ex Magno! quis iam non discat eam demum probari Magnitudinis fecunditatem, quæ pleno Iustitiæ conceptu sit grauidata? atque hoc ipso Magni nomen crescere in ter-
 ris,

ris, quoniam in Iustum sobolescit? Sed Magnum esse, cæco fati præmio sola plerisque dedit natalium præstantia: cum nisi ex rectissimis operibus iustum fieri non contingat. Hoc equidem Iusti cognomento Henricum vicisti Patrem Ludouice; par cætera, imitator, successor. qui Galliarum itidem patrimonium generosissimæ Tuæ virtutis stupendis facinoribus, mittendisque in omnem posteritatem triumphis, magis auctum, ornatum, fortunatum simillimo Tui Filio reddidisti. Qua verò nunc prædicatione Te cōpellabo. Ludouice, qui humani generis futurus diu deliciosissimus comes, Galliæ nunc es, atque eris longum bonum, sempiterna felicitas? Excerptis iam pridem, ac veluti defloratis nominibus, quibus Gallorum Reges fama insigniuit: non qua corporum speciem Comati, Pulchri, Proceri titulo; sed qua animos Pij, Magni, Iusti, cæterisque inclytis laudibus exornauit; quid Tibi cognominis seposuerit, haud satis internosco. Nisi quæ Auus, atque Pater occuparunt amplissima, tamquam Paternæ, Auitæque gloriæ cretione, vtrumque Te, & Magnum, & Iustum appellemus. Sed minuta fortasse sunt hæc, & veluti ancillantia nomina eximio cuidam alteri, ac raro, quod Cælo nuncupatore induisti. Planè equidem in isto Tuo Ludouicorum quarto supra decimum numero, veluti critico ac potenti, insigne nescio quod felicitatis primordium, arcanumque, & inusitatum altioris fortunæ argumentum fore excitandum præfagibat animus. En DEODATVS quasi indigo Orbi, ac generi humano aduenisti. Tolle nunc animos superbitura meritò Gallia; tantoque munere Cælitus dato quàm diutissimè perfruere.

Non

Non nisi Datum Optimum , non nisi Donum Perfectum à Patre Luminum descendere posse consecrata veritas est . Neque Tu Ludouice , nisi similes è Cælo laudes , cognatasque virtutes ad nos deferre potuisti . Quemadmodum igitur Cælum perpetuo circumactum orbe non lassatur , aut deficit ; sed agitatione , ac motu perennat ; ita quoque mens Tua Egregij publici cultrix assidua , iugi labore integratur , ac viget : dum præest , ac interest omnibus , dum omnium , ac singulorum satagit , nihil improuium , incogitatum nihil præteruehitur ; & ad innumeras fermè tam excitati , tam viuidi , tam actiuosi Regni curas , non auspicijs tantùm aut numine , sed interuentu , atque opera sufficit . Rarum penitus , atque inusitatum est Ludouice in isthoc tuo blandissimo annorum flore tantam regnatricis prudentiæ maturitatem edere : atque in ipso statim rerum gerendarum tyrocinio , veteranum adeò consilium , atque experimentum ad publicos actus capaci pectore circumferre . Magna imperia magnis indigere adiutoribus quis iam nobis seuerus sapientiæ magister decantet ? Vna optimi Principis virtus , publica veluti anima , ac spiritus quacumq. diffusus : vna illa Tui mens Ludouice vastum imperium satis fortunat , atq. implet . Te vno conspecto se reficit Gallia , acerbæque iacturæ (ac nunquam non tamen deplorandæ) castigat lacrymas , sensumq. obtundit doloris , quem ingenti nuper amisso suæ amplitudinis custode , ac tutore conceperat . Quòd periuros autem , ac rebelles contumaci seditio- nis capite perfidiæ virus ebullientes , terrore partim dissipaues , partim clementia compescueris . Quòd focijs , tuamue clientelam professis salutaria arma im-
ploran-

31
plorantibus præfenti ope succurreris, creditumque Tuo
nomini latus protexeris. Quòd hostium audacia de-
pressa, elusis consilijs, attritis viribus, furore diruto,
fines malè tutos deferere, oppidis, agris, domibus ex-
cedere iusseris, nouasque Imperio assertas gentes, atq.
vrbes adiunxeris; militaris equidem gloriæ tuæ, ani-
mique prorsus inuicti, & ad Martium decus elabora-
ti præclara sunt, atque egregia paucissimis æmulan-
da facinora. Tuæ dicantur pueritiæ rudimenta re-
gnantis, castrenses plausus pro crepundijs, pro nænijs
victorias, pro ludis habuisse triumphos: quorum pro-
sperrimos successus, nec viarum difficultatibus, nec iti-
nerum longitudine, nec peregrini Cæli nouitate, aut
iniurijs, nec morbi lethalis desperata rabie conterritus,
aut rumpere, aut flectere Te dignum Rege cen-
suiſti.

Sed aliò Tua me vocat rarior, ac numerosior præ-
stantia. Vires namque bello experiri, & cruenta
insultare potentia, regium fortasse est, aut saltim ex-
istimatur. Armorum quoque detineri studio, pu-
gnandoque dulcem sibi laborem, magnamque fa-
mam parare, antiqua laus, & Gallici populi, &
Borboniæ Gentis habeatur. Ferocire demum, ac pe-
riclitari ea ætate, quæ baltheum, & cassidem patitur,
quæ sudum atque vdim Cælum perinde æstimat;
neque nouum, neque insolens integra quotidie ad-
miratione intuemur. Quòd verò Tu Rex, Tu Gal-
lus, Tu Iuuenis in tantam rerum ciuiliū dispensa-
tionem incumbas. Quòd publicæ quietis, pacis, se-
curitatis fructus senili adeò consilio promoueas. Quòd
non de imperio nunc amplificando, sed amplissimo
stabiliendo, optimisque legibus, ac moribus firman-
do re-

do recogites : Tua est Ludouice singularis ; ne dicam inauditi exempli celebranda in omne sæculum prouidentia : O augustiora tempora ! O dies in aurum , atque innocentiam recusos ! si Iustitium crudelitatis , si languor audaciæ , si irarum Alcedonia , humanique cruoris feriæ , atque ocia Te regnatore decurrent . Nisi tamen hoc vno iracundus , & minax recrudescit ad bellum Tibi animus , cladem ac vastitatem meditans immanissimo Christianæ libertatis hosti : cuius arma sicubi ; aut aliàs diritate atque odio imbuta , lacepsitæ ad Istrum gentes iam iam sub ictu experiuntur . Quòd si qua ope Tua Cretenfes nuper ambages Hotomanicum monstrum eluserunt ; maiori faxis nunc apparatu , Pannonijs vt è claustris , ac limite Dacico quàm longissimè depellatur . Vincant ripæ Danubij , & Carpathijs præstent littoribus : ac nisi vultus Tui firmissimum adiumentum , Tuarum saltem legionum validiores longè suppetias intueantur . Illuc , illuc communia Te vocant pericula , ac nobilis triumphorum seges inuitat . In Te cum primis vnum conuersa Europa respectat . Paterna cunctos hortatione , & cura erigit Vigilantissimus Evangelici fœderis Custos in terris ; præmijque , & gloriæ tam egregium opus mansuræ quanta maxima sanctitate , ac religione animat , accendit , impellit . Cæterum Tuis , & inter Tuos æqui bonique honorem illibatum tueri , pacisque emolumenta præbere ; ac percipere , quanta consultissimi incepti laude , quàm læto successu perseueras ! Pridem hostes ; nunc dolum , temeritatem , proteruiam , cæteraque urbium vitia profligas . Militum paulo ante ; nunc virtutum facis dilectum . Nuper lustrabas exercitum , tesseram dabas ,

dabas, agmen ducebas; nunc inspicias tribunalia, fora exerces, iura cognoscis. Ex Victore Pius, ex Forti Iustus, ex Formidabili, atque Ultore Pacificator, & Clemens. Et omnia simul, nullo alterutrius detrimento audis. Quis iam blando Tuo affatu non recreatur, non animo misericordie erigitur, non manu adiutrice, ac beneficienti corde fouetur? Quis Te Principe vivere se, & spirabilem hanc lucem haurire, felicitatemque inesse mortalibus, Deumque, & Providentiam nobis immisceri non sentit? An ullus Te Quæsitore pauperum filios circumuenit, viduarum solitudinem premit, morientium voluntates eludit? Suos finibus limites, itineribus securitatem, alimenta urbibus, nauigationibus portum, mercimonijs frequentiam, operibus mercedem, laboribus pretium, disciplinis cultum temerare quis audeat, dum Tu vindex, atque iudex interuenis? quis consilia privato studio corrumpere, leges gratia violare, honores ambitu exculpere, suffragia precibus eblandiri, sacram sanctamque Dicen auro prostituere, prauisque tandem opinionibus (quantum nuper recrefebant!) rectissimum pietatis usum conuellere, dum Tu censor, inspector, castigatorem incumbis? Dum Tu in ista feruida ætatis vigilantia totum Te Reip. tradis, & occupas: neque per vicarias aures, aut ectypam (ita loquar) providentiam, sed tuo ipso oris typo, norma-que præsentiae omnia hominum, & quod magis est, negotiorum omnia admittis humaniter, tractas sollicitè, feliciter conficis. Ac nisi perperam iudicat animus, Tuæ idemtidem æquitatis opus crediderim, quod tam egregia Sponsa (cui plenissima laus est Te patruele censi) Etruriam nostram fortunaueris.

Maiores in terris facere nomina cum nequiremus, geminas olim Galliae Virgines nuptiali credito dederamus. Tu igitur in hoc quoque iustitiae colendae attentissimus reddere nuper voluisti. Et quidem (quod speramus, ac vouemus) cum ingenti heroum foenore accepturi. Quam concordi, & alterno cuncta librantur aequamento ! Catharina olim Medicea ante annos amplius septuaginta Christinam neptim Lotharingio patre, genitrice progeneratam Gallica, quasi debitum solutura obtulit. Maria deinceps & Tibi, & Sponsae pariter auia, Margaritam Gallico genitore, Lotharingia parente, posthumum hodie repraesentans officium Te nunc expromissore, & parario restituit.

Agnoscit ergo Etruria inter maxima partae à Te pacis ornamenta tam inclyti connubij veluti redditam fiduciam, praestitamque fortunam. Non poteras, imo nec debebas alia dare pignora tranquillitatis, nisi nuptiales hac illac spargendo nexus: quibus ipsis Maximum Tibi Regem concilians, exoptatam pacem Europae, atque Orbi reduxisti. Agnouit Gallia foecunda viris, vrbibus diues, beatioribus Caeli radijs circumfusa, tam alti beneficij emolumentum; atque aureum Tuae sapientiae opus gliscente quotidie felicitatis sensu declarat. Quicquid amoenis dulcescit illic, & coloratur in saltibus; quicquid innascitur glebis, aut pascuis nutritur; quicquid cauernosis terrae demitur latebris, sub manu creuisse colonus, & fofsor, & pastor fateantur. Neque ad longos anni vsus, Galliaeque saturitatem dumtaxat toto diuitiarum Cornu se se Copia diffuderit: sed superuacuas opes in orbem licitorem, vt alias omni tempore, ita nunc quam exube-

exuberantissimè diuiserit . Nec minus fabrorum labor, quales quantosque nutrit Gallia (ne quibus naturæ vberibus artifices illic manus concedant) peregrinas industrias, atque exquisita operum ingenia, quacumque in alienas partes necessitati, delicijsue mortalium, ut vnquam maximè dederit . In tantis tamen gaudiorum triumphis, beatæque reductæ pacis argumentis, parùm sibi ingenitæ vbertatis compos, nouæque felicitatis conscia videbatur; nisi rariores atque incomparabiles merces effunderet; nisi Heroinas diuideret; Etruriæ verò Margaritam daret, qualem nec pretio augustiorè Ægyptius vnquam luxus dissoluit ad mensam, nec læta significatione optabiliorem vlla Scytharum religio notandis feliciter diebus recondidit. Etrusca Prouincia nullius alioquin indiga rei, quam vel cultor legat industrius, vel solum spatiosè lætum indulgeat; hanc vnā tamen pulcherrimam, ac necessariā mercem expetijt. Hac vna Liburnicus Portus, cæteroquin Italiæ ditissimus, vbi primū vidit aduectam, carere se non posse cognouit. Ne suas opes, suasque gazas beatissimis Indiæ oris Tyrrenum littus inuideret, hanc sibi importari, atque inferi Margaritam optauit. Quam equidem naturæ ne admirandum opus, an speciosius artis complementum appellem, ancipiti cogitatione diducor. Pulchritudinem natura dedit, ac venustatem, decusque lectissimum; candidam, si quid aliud, genarum lucem adspersit, præcipuam videlicet Margaritarum dotem, sed & gemmeam purioris animi notam pellucidis se se lineamentis ori inscribentem. Mirata nuper Etruria, exteræque Nationes miratæ sunt certatim huc confluentes, cū primū fortunatissimo

ingressu Florentinam Urbem subiret. Quàm inusitata pompa, quàm nouo excipiendi apparatu illa venit! Gaudij certè impetus fuit, qui portam sæculo, ac decennio clusam aperuit; obductumque propugnaculi aggestum, quo tamdiu veluti obsessa latebat, diffecit, egeffit, coæquauit. Nempè quos impendentium bellorum metus fecerat vallos, securitatis Obsidi, pacisque, & amoris Conciliatrici, non nisi strage; ac ruina sua litare oportebat. Haud aliter olim in sacris Græciæ certaminibus renunciati victores: non quæ cæteris patescit aditus, sed stratis moenibus reduces in patriam excipiebantur. Quippe nullius indigam munimenti eam urbem censebant, quæ tantos in sinu ciues complecteretur. Quis autem vel durato cespite, & congesta maceria, vel structili opere, & anguloso muro immolitas portas propugnandæ Florentinæ Vrbi expetierit: quam tanti nominis Sponsa, veluti Mater (vti speramus) Semideorum turrita ingrederetur? Nisi tamen Equi instar Duratei, grauidam nostro saltem urgente desiderio aluum, Heroumque plenam per murorum hiantium lapsus vt inferret, omninò fas videbatur. Quæ tunc verò celebritas, quæ lætitiarum panegyris, cum Penates nostri quasi in occursum exirent; atque vrbs extra urbem arcubus, ac theatris procederet! Qui fauor circumfusus exercituum hinc inde fausto rumore, & obiecto latere aditum, plausumque facientium! quæ palam, atque amanter officiosa votorum certamina iucundis suspirijs, lacrymisque concepta, cum in ipso vrbis limine ad Sempiterni Regum Regis puluinar coronanda sisteretur! Quàm diuite, quàm pia, quàm solenni tunc Religione! Qualis præcūtum turmarum deduc-

deductio, vel antecedentium equo procerum longo ordine comitatus ! Aut quæ pedisequorum examina versicolori cultu nitentia, compositis vestium notata classibus, splendido textilis, futilis, pensilis auri detrimento superba ! Spectaculo, ac voluptati erant pulcherrimæ vrbis latissima itinera, productissimæque viarum spatia populosis multitudinis gressibus mox in semitam coarctata. Sublimes ædium contignationes interiùs desertæ, pendulo hospite, aut inquilino habitata : locaue nec vestigij capacia, qua proiectis, qua implexis laborantia corporibus, atque vnde acies oculorum dubia emanabat, spectatoribus non spectaturis conferta. Magnificum ad hæc ornandi itineris instrumentum, splendida fercula, sumptuosæ rhedæ, patriciæque pubis gestatu thensa præfulgens, quæ Regiam Virginem inumbrabat. Sed Regia hæc Puella inuicem viliora illa omnia inumbrando, luminosissimi vultus maiestate extinguebat. Respuunt iam oculi quicquid nuper tota pompa stupuerant : quicquid nitore, sumptu, diuitijs placuisset, longè infra vnum Margaritæ adspæctum æstimantes. quæ frontis, genarumque inæstimabili decore splendescens, pudica oculorum demissione venerabilis, totoque corporis habitu ad immensam dignitatem erecta, nihil adeò in illa speciosissimi culminis luce, ac moderationem, grauitatemque tuebatur. Naturæ scilicet, corporisue dona, quæ Margaritam commendant, præstantior disciplinæ, artisque ornatus vincebat. In Lotharingiæ conchæ materno sinu gemmantis educationis succum Margarita hauserat ; quid nisi vertendum in candoris alimentum, emendatam, rotundamque morum puritatem, atque elegantiam ?

Sub

Sub Genitricis ergo castigatissimo documento Sororibus benè sociata simillimis, & virginalis gratiæ sanctitatem, & parci sermonis temperamentum, & sincerum nudumque animi candorem, & inculpatum omninò pietatis studium pleno didicit exemplo referre. Huc enimverò Gastonis quoque Parentis altà domi legem trahamus par est. Princeps quippe hic pacis artium exornator, antiquiorum subinde litterarum eximius, ac munificus cultor, dum Regios fratris liberos pulcherrimum pignus imperij tranquilla regit sollicitudine: suas itidem lectissimas filias complexu, vultuque ipso custodit. Egregiè quidem ille de Gallici Regni amplitudine meritus. Quòd enim foris Ludouicus frater victorijs, ac triumphis Europam peragraret; hic pacem, securitatem, artesque præclaras suos apud ciues fouebat. Quòd ille fines Regni armatus, ac ferox extenderet: hic partis iam rebus fidus, ac vigil incubabat. Ditionem quòd ille, atque imperium militari virtute, ac bellicis studijs affirmaret: hic ditionis atque imperij futuros olim successores, crescentia germina, & Spes Augustas Bourbonij sanguinis attentus domi rector educabat. Neque tamen, cum belli vsus poposcit, strenuè res gerere distulit; hinc hostes arcendo finibus; illinc in eorum penetralia, Cortraco, Grauelinga, alijsque expugnatiss vrbibus, gloriosum Gallis aditum patefaciendo. Tam beatis ergo naturæ, fortunæque succincta muneribus, tantisque in Maximorum Parentû sinu ornata virtutibus, venisti tandem Margarita Sponsa. Venisti non tam expetita nobis, Tuoque Sponso diurnis meditata suspirijs, quàm Iure suo reposcenti Galliam Etruriæ venisti. Quòd si Etruscus olim quidam

dam extitisse fertur ; qui Gallos frugum dulcedine,
 pomorumque sapore pellexit , vt superatis primùm
 horrendis Alpium faxis in Italiam descenderent : E-
 truscus hodie Princeps Te Gallicam Heroïnâ am-
 oris suauitate , ac nectarei prorsus connubij fide ad se
 vocat . non vt armis , damnisque Italia vastetur , sed
 generosissimâ , atque amplissimâ Sobolis ornamento
 beatiorem efficiat . Venisti autem in eiusdem Ita-
 liæ Florentissimam partem , nobilis sceptri futura
 consors , quod Mediceus Geryon trium quondam
 potentium Rerum Publicarum conflatis in vnum cor-
 poribus , meliori auspicio nunc gestat . Densâ hic
 oppida se se Tibi offerunt , & antiquo claræ nomi-
 ne vrbes : locorum opportunitate atque vsu : ædifi-
 ciorum nitore ac magnificentia : habitantium cultu ,
 atque elegantia cum primis Italici soli spectandæ .
 Benè fidæ hic Nauium stationes , atque emporia se
 se pandunt instructissima . Nec minus sapientiæ com-
 mercijs opulentissima hic celebrantur lycea , clarissi-
 mæque doctrinarum ~~aperiuntur~~ palæstræ : quarum
 è puluere tot magni prodire Pancratiastæ , qui vi-
 cturis scriptis , & eloquio barbariem , atque impie-
 tatem profligarunt ; moribus , exemplo , prudentia
 nomen ipsi , ac patriam suam , litterariam Rempubli-
 cam , Christianam Ecclesiam mirificè adiuuerunt , il-
 lustrarunt , propagarunt . Fortissimorum hic sedes ,
 atque origo militum ; quos non tam nobilitatis aurum
 commendat , quàm sanguis barbarorum maritimis ex-
 pressus periculis ostro ad immortalitatem insignit .
 Hic ad quæsitissimos artium conatus acribus limata
 studijs ingenia ; quæcumque scalpro , tabula , nor-
 ma defudant ; quæcumque stylo , radio , numero
 impal-

impallescent . Quorum scita , & laudabilia inuenta , pretiosissimis nunc aula instrumentis ; nunc cimelijs , & scrinijs musæa ; nunc pluteis , forisque bibliothecæ ; nunc tam multis , ac varijs aliæ vrbes operibus , sed Florentina potissimum Etruriæ Princeps , numerosis , stupendisque molibus penè in Cælum egressis ad æternitatem ostentat . Tuis verumtamen oculis , quin etiam nostris , nihil erit (reuera scimus) aut mirabilius , aut pulchrius desponso Tibi , Tuique simillimo , ætate , sanguine , moribus Principe : quem concordi dulcedine , beatique amoris diuturno sociandum complexu fata pridem adnuerunt , Europa nunc atque Orbis gratulatur .

Ita Vos ad repetitum fortunatissimæ Sobolis gaudium pronuba Cælorum indulgentia coniungat ; vt illas , quas modò contemplabamur , gliscere in posterum artes , florere ingenia , prouenire agros , crescere mœnibus , tectis , incolis vrbes , Martios ad fortia facta euocari altiùs animos inspiciemus . Tyrreni Argonautæ in eo Signo vincentes , quo pallet impietas , exultabant nuper , cùm Te Masiliæ soluentem placido , ac reuerenti tanti oneris mari , in nostras hæc oras triumphali classe trajicerent . Quid ni illi exultassent ? Margaritam Phryxæo quocumque velere pretiosiore vehentes : primum sanè ornamentū , ac lumen Coronarum , eiusce nempè nominis , cui sacram armati pectoris fidem Stêphanitæ milites dederunt . Altiori quantò tamen profiliunt illi lætitia , cùm Sponsum Tuum , Teque fortasse illi comitem , naui , armis , periculis consortem (quales bello feroces Radegundem olim Tuam , aut Puellam Aurelianensem annales memorant Gallici) : omnino au-

41

nò autem generosa Tui vteri germina , hinc ad Ægai latebras , & freta Marmarica , illinc ad Arabiæ , atque Orientis sinus metuendis triremibus transportabunt. Eisdem verò Liberis benefico enixu gloriose tollendis , vt fausta , ac fortunata omnia voueamus , plenoque secundissimi euentus augurio benè nunc ominemur , & obsequij ordo , & orationis hic tandem locus nos admonet. Si quid verò fabularis nos capit illecebra , aut blandis Poetarum commentis spes nostras quoque fingere minùs dedecet : & amicam Venerem , & propitiam Tibi Lucinam spondemus. Nemo enim illud ignorat , Iunonij lactis , cùm turgido exiliret è pectore , post inspersam Deorum semitam caducis veluti analectis Lilia in orbe canduisse. Fauorem proinde , nutumque obstetricis Deæ gentilitijs Tuis Floribus augurari quis vetet ? Non nisi quoque Cælestis Veneris , pudicæ Heroum conciliatricis opus interpretari licet , quòd Sponsum Tibi stiterit periculis morborum haud ita pridem defunctum , quibus pueritia tamquam vectigalis se se obstringit. Ne quid scilicet ille in posterum fugitaret commercij : Tu illi quidquam metueres , quod Regiam frontem iniuriolis maculis minùs spectabilem , minusue placituras Tibi redderet. Serio dicam ; ne quid grauius illi timeres ab immani contagione , quam veluti epidemiam Principum intra vertentem annum Europa perhorruit . Omnino autem qui Tuis amplexibus progredi in virum , grandescere in patrem debebat , puerilia quoque dedidicisse , ac superasse condecuit. Ea vtinam sit Veri , ac Sempiterni Iouis voluntas , vt quicquid malorum in fati tabulis apud se condebatur , eo toto dispuncto , sola in posterum

F

felicitas

felicitas vtramque paginam faciat. Quicquid infortunij Etrusco populo, Serenissimæ Genti, Tibique ac Sponso impendebat; siue inclementi sydere ferienda salubritas; siue hostili furore laceßenda pax; siue maligno anno concutienda vbertas, id totum exhaustum sit: ac nullo temeranda mœroris turbine, liquida posthac, tersaque dierum currat serenitas. Nihil, nihil vel noxia labe corpora affligat; vel tristi cogitatione animos turbet; vel diro successu Ciues, Domum, Imperium, Liberos Vestros afficiat. Quorû fortunatæ iam procreationi non Iuno tantum fabulosa hæctenus præluserit: sed mulierum dominantium, matrumque familias alta in Domo potentium verum decus, ac splendor viam auspicatè demonstraret. Iustissimum nuper votum supremo terrarum, syderumque auctori reddidimus pro felici, diùque exoptato puerperio Serenissimæ Victoriæ, Regnantis Ferdinandi incomparabilis Coniugis, quæ Augustam Etruriæ Domum alterius tandem Geniti prole communiuit. *Quis non gaudere visus est; atque alto intimæ voluptatis sensu perfundi?* Nempè in meta iuventæ cum vterus diù torpuerit, officia matris animosè resumpsit: sobolem nobis repræsentando eiuscæ sextus, viuacitatis, ac spei, quæ vel nostros optandi conatus faciliè vincat.

En Tibi Margarita in Victoriæ partu fœcunditatis prodromus, ac melioris Lucinæ omen auspicatissimum. Post longam illa cessationem iter signat, & faces præit felix puerpera. O quando illam nobis lætissimam lucem videre contingat duplici signandam vagitu, cum duo Principes æuo gemini, cognatione impares eandem fœminam in eadem domo auiam
simul,

simul, ac matrem hora eadem ostendant, ac faciant! Habes quam sequaris faustitatis prænunciam, parien-
dique recens, vel fera iuuentute magistram. Habes
quam complectaris fortunæ, morumque sociam, ac
consultricem. Præclarum Tibi virtutis præsidium e-
rit, siue Socrum intuearis viuentem, siue è proavis
Tuis Christinam Materteram magnam suspicias; om-
nia ad egregiæ laudis compendium, summæque gra-
tiæ imitamentum occurrere. Quicquid hic est, quo
virginei pudoris modestia, matronalis verecundiæ di-
gnitas, publicæ priuatæque pietatis cultus meliori
lege seruatur, aut crescit: quicquid quod ægris sola-
tium, perflugium miseris, leuamen afflictis, egenis est
beneficium: id magnam partem prudentissimis, in-
corruptissimisque earum exemplis debetur. Paria de
Te, ac maiora nobis spondemus, & ingenitæ Tuæ
magnitudinis, virtutisque excellentia, & inculpati,
ac lectissimi Sponsi societate. *houp.*

O Felix Etruria! o inuidenda tam beati connubij
forte Prouincia! Quid Tibi aut togati regiminis sapien-
tia, aut bellicæ virtutis imperio illustre, ingens, au-
gustum expectare non audes? O nobilissimum pu-
gnacis Galliæ, & religiosæ scædus Etruriæ! O seque-
næ vndam Arni gurgitibus feliciter copulatam! O
Celticos Druidas Tyrrhenis Lucumonibus: O Sol-
duriæ Gallicos lictoribus Thuscis: o gæsa fascibus:
o Sellis petorrita benè iuncta curulibus!

Quæ nunc æternitas Regum, adorandaque He-
roum familia attendente Cælo, vestrique amoris,
maritæque concordie spondente vinculo, Augusti
Coniuges, balbutire iam virtutem, iam gestire ad
fortitudinem, nutriceque maiestate generosis reptare

ad gloriam conatibus propè videtur ! Omninò tempus illud cunarum, atque vberum voto preminimus, speque valida impellimus, cùm Tu Margarita Mater Patriæ diceris, vt Aurelianensis olim Ludouicus Pater Populi audijt. Impotentiùs autem diem illam anhelamus, cùm adultos Tui vteri fructus, summisque rebus maturos, obsequijs nostris deducemus, protegemus corporibus, famulatuque, ac ministerio in longa imperij fortuna, ad ingentes cùm pacis, tùm belli vsus nostram illis fidelissimam operam adprobabimus. Cùm ad vltimam, sed viridem tamen progressos lentè senectam, nominis, ac laudis ob eximiè gestorum amplitudinem tam multa securè, ac firmiter perfrui collecta mercede intuebimur: quanta cum ipso vix funere Orbis, postremaque rerum omnium eluuie decrescere illis, aut carpi queat, ne dum obliuionem, aut deliquium penitùs pati. Sed nimium videlicet est, quod ipsi ambimus, aut speramus videre. Vel nostri nec audeant liberi, Vestros Liberos duratura ætate adæquare. Aurea Vestrorum vita tam prolixo ducatur stamine, vt quam nostri pleno iamdiù annorum iugo iustus lethi culter telam abrumpit: id Vestris netum vix licium dissimulantis Fati ferissimas manus expectet. Interim, quod res est, ad Etrusci Solis serenum in iuuenta diluculum toto fecunditatis rore impleare, felicitis sæculi auroram gemmeo nobis conceptu daturā. Datura inquam niueos ciuiū mores, albos lætitiæ dies, lacteos virtutum cursus. Quid ni tantumdem sub Margaritæ, ac Liliorum candore, spe atque animo præsumamus? Nisi auream malumus innocentioris æui ætatem ab Aurelianensi Nupta repetere. Sic mutua interim cura,

Regales

Regales Sponfi , mutuus estote, atque inoffensus ardor , nullo vnquam frigore remittendus ; sed flammis quotidie amantioribus instaurandus . Sic fœdus animarum excolite arctissimum ; nexumque cordium inuiolabilem beata iugiter consortione perstringite ; vti Vester Thalamus nostra erit quies , amplexus & oscula deliciæ nostræ ; nostra incolumitas Vita Vestra ; Liberi Vestri securitas ; & gaudium nostrum . Exiliter nimium dixi : Erunt quinimò sæculi lumen , Principum regula , Italiæ ornamentum , Etruriæ beatitas , Christianæ Reipublicæ decus , Romanæ Ecclesiæ fida , ac potens tutela . Vt verbo comprehendam : Maiorum suorum æmulo virtutum passu grandia calcabunt vestigia .

Quòd si precationibus , ac votis , quibus nuptialem vestram prosequimur celebritatem , munera quoque adiungenda ex veteri instituto deposcitis , libentes meritò damus . Non qualia ad Pelei , ac Tethyos nuptias , vel Cadmi , & Harmoniæ coniugium collata quondam celebrarunt Poetæ . Tunc enim pro se quisque Deorum splendida , ac magnifica tradidere : hastam hic amentatam fortitudinis argumentum : alatam hic virgam sceptrum facundiæ : hic arcum lucis magistrum : hic monile ignis experimentum : aliam alij suæ potentiæ tesseram , nouis ornamenta nuptis dedere . Quid verò nos ? Non diuina munera , sed ipsorum qui præbuerunt Deorum potentissimum Vobis deum Amorem elargimur . O munus rari datoris ! rari etiam qui mereatur accipere . atque ideo beneficum , atque illustre , quoniā neq. iuberi , neq. cogi potest vt detur . Obtulerint alij , quæ in redimiculum , aut Sandalia regnantium

vxorum , aliamue mundi muliebris partem molli ,
 ac specioso titulo erogentur . Nos dum Amorem
 offerimus , non munditiæ , aut cultui vestrorum cor-
 porum ; sed Reipulicæ ac dominationis bono , vestri-
 que nominis , fortunæque ornameto consulimus .
 Bullam cordis imagine præmium fœcunditatis acce-
 pisse olim fertur Hersilia ; quoniam prima post coali-
 tas hinc Sabini , illinc Romani sanguinis domos in-
 fantem pepererit . Nos vera corda , ac spirantia ,
 sinceram fidem , perenne obsequium etiam ante
 quàm parias pollicemur . Quòd si mortalium flagi-
 tiosissimus , atque Imperatorum deterrimus vnica
 infinito propè Quiritium populo exoptauit ceruicem ,
 vnico vt ictu amputaret : nos è singulorum cordi-
 bus vnicum voluntate , amore , consensu facimus cor ,
 vt faciliori deditioe offeramus . Verùm opportunè
 subsidiariam cordis operam imploramus , cùm lin-
 gua titubat , labra torpent , eloquium deficit ; neque
 vllam satis laudum vestrarum immensitatem , gau-
 diorum nostrorum *inexplicabilem* copiam , Inuicte ,
 ac Generose Cosme , Regia , atque Inclyta Marga-
 rita , indiferti , imparis , reptabundi oratoris sonare
 vox potest . Sed & cordium votis dum delegamus ,
 quod loquela præstare posse desperat ; diser-
 tus fit inuicem populi plausus , clamosus
 famæ rumor , vocales annalium lin-
 guæ , facunda posteritatis
 memoria

* * *

* *

*

Chimentellii



